

## Agong, Raja Permaisuri hargai jasa bakti perwira negara

Julai 31, 2022 @ 5:02pm



KUALA LUMPUR: Yang di-Pertuan Agong, Al-Sultan Abdullah Ri'ayatuddin Al-Mustafa Billah Shah dan Raja Permaisuri Agong, Tunku Azizah Aminah Maimunah Iskandariah menzahirkan ucapan selamat Hari Pahlawan kepada seluruh warga Angkatan Tentera Malaysia (ATM) dan Polis Diraja Malaysia (PDRM).

Istana Negara menerusi laman Facebook rasmi hari ini, memaklumkan baginda berdua turut menzahirkan penghargaan kepada perwira ATM dan PDRM atas jasa, khidmat dan bakti dicurahkan dalam melindungi kedaulatan serta keselamatan tanah air.

"Selaku ketua utama negara dan pemerintah tertinggi ATM, Seri Paduka amat menyanjung tinggi dan merakamkan setinggi penghargaan atas pengorbanan dicurahkan tanpa mengira masa serta penat lelah dalam menjaga keamanan negara," kata hantaran itu.

Al-Sultan Abdullah dan Tunku Azizah turut menzahirkan penghargaan kepada seluruh keluarga barisan pahlawan dan perwira yang terkorban ketika bertugas.

"Sesungguhnya jerit perih mereka, pejuang tanah air seketika dulu dan masa kini adalah demi negara kita yang berdaulat.

"Baginda berdua mendoakan roh mereka yang terkorban dicucuri rahmat Allah SWT dan ditempatkan bersama solihin. Berjuang demi negara," katanya.

Tarikh 31 Julai setiap tahun diisytihar sebagai Hari Pahlawan sempena tamatnya darurat menentang komunis pada 1960.  
- BERNAMA